

# Cambià u Mondu

S'e avissi a putenza  
Adupraria tandu e forze  
Per fà sparte l'abbundanza  
E di a pianeta e risorse  
Ghjuvendumi cà di l'arme  
Per chi nimu morga di fame

S'e avissi a sapienza  
A struzione è u naturale  
S'e era d'alta intelligenza  
Di rinumata universale  
Tandu faria chi a scenza  
Possa curà ogni male

S'e avissi donu divinu  
E i miràculi pudè fà  
Cambiaria lu destinu  
Di à chi nasce per strazià  
Eppo esse induvinu  
E ancu a disgrazia parà

S'e avissi lu cummandu  
Pigliara e decisione  
Per chi più mondu tandu  
Si trovi in situazione  
Di lascià more u puvarellu  
Per tratichjà u riccone

Chi u riccone ùn si ne face  
Quessa eiu aghju capitu  
Mancu appena li dispiace  
Mai ùn pisarà un ditu  
Chi lu troppu techju si sà  
Micca crede u famitu

S'e fussi lu più supranu

Truvaria le manere  
Per fà u mondu più umanu  
Senza muri nè fruntiere  
Induve ci dariamu a manu  
Libari senza galere

S'e fussi lu Criatore  
Cambiara oghje a figura  
Fendu di a tarra un fiore  
Mezu à un nidu di virdura  
Induve ghjustizia è amore  
Sarianu a maio primura

S'e avissi u putere  
Di pudè cambià u mondu  
A faria incù piacere  
Per ch'ellu girga più tondu  
Per fà finisce le guerre  
E dinù salvà u circondu